




**«ЧЫЛАЖ ВЕРЧАТ
ЮМЫЛАН ТАУ»
АКАФИСТ**



Йошкар-Ола
2025

*Йошкар-Олан да Марий Элын
Высокопреосвященнейший митрополитше Иоаннын
благословитлымыж почеш*



АКАФИСТ ЛУДМО РАДАМ

Тўнгалтыш молитва-влак

Господь Иисус Христос, Юмын Эргыже, Пеш Яндар Шке Аватын, чыла святой-шамычынат кумалмышт верчын мемнам серлаге. Аминь.

Тау Тыланет, мемнан Юмына, тау Тыланет.

Пылпомышысо Кугыжа, Чынлан туныктен йывыртыктыше Шўлыш, Тый чыла вере улат, чыла ситарет, керек-могай порылыкат Тый дечет лектеш, ылышым Тый пуэт, көргышкына толын пурен иле, чыла осал дечат мемнам эрыкте, Поро Юмо, мемнан чоннам утаре.

Святой Юмо, Святой Куатле, Святой Колыдымо, мемнам серлаге *(3 гана)*.

Тау Ачалан, Эргылан, Святой Шўлышлан, кызытат, керек-кунамат, курым-курым мучкак. Аминь.

Эн Святой Троице, мемнам серлаге; Господь Юмо, язык деч мемнам эрыкте; Ашныше Юмо, мемнан осалым ыштымынам кудалте; Святой Юмо, толын, Шке лүмет верчын, черна деч мемнам паремде.

Юмо, серлаге (3 гана).

Тау Ачалан, Эргылан, Святой Шүлышлан, кызытат, керек-кунамат, курым-курым мучкак. Аминь.

Пылпомышто улшо мемнан Ачана! Тыйын лүмет мокталтше, Тыйын Кугыжанышет толжо, Тыйын эрыкет мланде үмбалнат Пылпомышысо гаяк лийже. Мемнан илышаш киндым, тачылыкым, мыланна пу; кудалте мемнан язык-шамычнам, весе-шамычын мыланна ыштыме языкыштым кудалтымына гаяк; языкышке мемнам ит пурто, осал дечын мемнам утаре.

Юмо, серлаге (12 гана).

Тау Ачалан, Эргылан, Святой Шүлышлан, кызытат, керек-кунамат, курым-курым мучкак. Аминь.

Толза, мемнан Ашныше Юмылан кумалына.

Толза, мемнан Ашныше Христос Юмылан сукен кумалына.

Толза, мемнан Ашныше Христос Юмылан Шкаланжак сукен кумалына.

50-ше псалом

Эй Юмо, Шкендын кугу кумылет дене мыйым серлаге да шуко порым шонымет дене осалем дечын мыйым эрыкте. Осалем дечын чарныдеак мушкын, языкем дечын мыйым эрыкте. Вет осалым ыштымем мый шинчем, да мыйын языкем эре ушыштемак коштеш. Тыйын ончылнет языкым ыштенам да Тыйын шинчат ончылно осал пашам ыштенам, Тыйын каласымет раш да языкем верчын мыйым судитлымет төрак. Вет авам мыйым языкеш иландарен, да мый шочмем годымак яндар шочын омыл. Тый чон дене көргыштө төр шонымым йөрәтәт: пален шуктыдымо Тыйын законетым мыланем умылтарен туныкто. Тый иссоп выньык дене мыйын үмбакем шыжыкте да мыйым эрыкте, мыйым мушкын, лум дечат чот ошым ыште. Куанышашлык да йывыртышашлык шомакым мыланем колыкто: Тый дечет лүдшө луэм йывыртыкте. Мыйын языкем-шамычым Тыйын шинчат ынже ончал, да чыла осалым ыштымем деч мыйым эрыкте. Эй Юмем, мыйым яндар шүманым ыште да мыйын көргыштем чын шүлышым уэмде. Чурий ончычет мыйым ит кудалте да мый дечем Святой Шүлышетымат шупшын ит нал. Утаралтшашым да йывыртышашым мыланем пу да Ашныше Шүлышет дене мыйым пентгыдемде. Осалым ышты-



ше-шамычым Тыйын корнетлан туныктем, да
языкан-шамыч Тый декет савырнат. Юем, вүр
йоктарыме орлык дечын мыйым утаре, Утары-
ше Юем, мыйын йылмем Тыйын чын оетлан
куана. Господь, мыйын умшам почат гын, Ты-
йын кугу лүметым чапландарем. Надырым нал-
мет шуэш гын, пуэм ыле, *но* йүлалтен пуымо
жертвым Тый от йöате. Юмылан надыр — ой-
гырышо шүлыш, ойгырышо да үнгышö шүмым
Юмо изиеш ок пыште. Эй Юмо, Шке поры-
лыкет дене Сион калыклан порым ыште, да
Иерусалим олан пырдыжше тек нöлталалтеш.
Тунам чынын надыржым, нöлтал пуымым да
чыла йүлалтымым йöратен налат; тунам Тыйын
алтарет үмбак презе-шамычым пыштат.

Ушанымашын символжо

¹ Инанем чыла кучен Ашныше ик Ача Юмы-
лан, пылпомышым, мландым, чыла ужмынам
да уждымынам Пүрышылан. ² Юмо дечын шоч-
шо Иктак веле Юмын Эргыже Господь Иисус
Христослан, чыла курым дечат ожно улшо Ача
Юмо дечын шочшылан. Волгыдо гычын лек-
ше Волгыдо улмыжлан. Чын Юмо дечын шоч-
шо пүрыдымö чын Юмо улмыжлан, Ачаж дене
иктак улмыжлан, Тудын чыла пүрымыжлан.
³ Мемнан верчна, айдеме-шамычым, мемнам,
утарышаш верч, Пылпомыш гычын волен,



Святой Шүльшын куатше дене Мария лүман
Ўдыр дечын капан айдеме лиймыжлан инанем.
4 Понтий Пилат улмо годым мемнан верчна
ыресеш пудалалтме орлыкым чытен колымыж-
лан, тойымылан, 5 Юмын законышто каласыме
гаяк, кумшо кечын ылыж кынелмыжлан. 6 Пыл-
помышко күзен каен, Ача Юмын пурла мого-
реш шичмыжлан инанем. 7 Илыше айдеме-ша-
мычым, колышо айдеме-шамычымат судитлаш
кугу чап дене вес гана толшашыжлан, Тудын
Кугыжанышыже пытышашлык огыллан. 8 Адак
Святой Шүльшын Илымашым пүрышö Юмо
улмыжлан, Ача Юмо гычын лекмыжлан. Ача
да Эрге Юмо дене иквереш моктен кумалаш
күлмылан. Пророк-шамыч гоч Тудын ойлы-
мыжлан. 9 Апостол-шамычын мланде үмбалне
чыла иктеш туныктен кодымо Святой Черкы-
лан. 10 Язык гычын эрыкталтшаш верч ик гана
веле тынеш пурышашлан инанем. 11 Ўшанен
вучем колышо айдеме-шамычын ылыж кынел-
шашыштым, 12 курымеш илышашымат. Аминь.



«ЧЫЛАЖ ВЕРЧАТ ЮМЫЛАН ТАУ» АКАФИСТ

1-ше кондак

Курым-влакын эре улшо Кугыжаже, утараш шониметын вийже дене Тый айдеме илышын чыла корныжым Шке кидыштет кучет. Ме Тыланет мландымбалысе илышлан, палдарен да палдарыде ыштыме чыла порылыкетлан, Тыйын Кугыжанышетын курымаш куанжылан таум ыштена. Ончыкыжымат мыланна Шке чаманымашетым пуэн шого, да ме мурена: Тау Тыланет, Юмо, курым-курымеш.

1-ше икос

Мый ты тўняш вийдыме начар аза толынам. Шепка ўмбалнем Тыйын Суксет волгыдо шулдыржым шарен. Шочмем годсек чыла корныштем Тыйын йўратымашет волгалтеш да курымашлык волгыдыш ўрыктарышын вўда. Тыйын шонен пыштыметын поян пўлекше

шочмем годсек кызыт марте чаплын ончыктал-
тын. Чылаж верч Тыланет таум ыштем да Ты-
йым палыше-влак дене пырля мурем:

Мыйым илышыш үжшö, тау Тыланет; сан-
далыкын моторлыкшым ончыктышо, тау Ты-
ланет. Кава ден мландым мыланем уш-акылын
курумаш книгаже семын почшо, тау Тыланет;
жаплан пуымо тўняште Тыйын курумашлык
улмылан тау Тыланет. Палдарен да палдары-
де ыштыме чыла чаманымашетлан тау Тыла-
нет; кажне гана шўлыкын шўлалтымемлан тау
Тыланет. Илышемын кажне ошкылжо ден ку-
анжылан тау Тыланет. Тау Тыланет, Юмо, ку-
рым-курумеш.

2-шо кондак

Господь, Тый денет уна лияш моткоч сай,
тыште чылажат уло: лыжга мардежын там-
ле үпшыжö, каваш нöлталтше курык, кумда
вўд воштончышто шöртнö кечыйол модмо,
куштылго пыл чонгештылме. Ласкалык дене
темше пўртүс öрыктарышын йўклана, чыла
кайык ден янлык Тыйын йöратымашет дене
палемдыме улыт. Авана, мланде, шкенжын
вашке эртыше моторлыкшо дене суапландара
да курумашлык илыме вер нерген шонаш тара-
та, вет тушто, эре уло моторлыкышто, йонга:
Аллилуиа!

2-шо икос

Сымыстарыше райыш пуртымо семын Тый мыйым тиде ылышыш пуртенат. Келге канде талинга гай кавам ужна, тушто кайык-влак йүкланат. Вүдын шыргыктен йогымыжым да чодыран чоным лыпландарыше йүкшым колына. Тамле пушан сылне саскам да мүйым кочкына. Мландымбалне Тый денет пеш сай, Тый денет уна лияш чот куанле.

Илышын пайремжылан тау Тыланет; ландыш ден розан тамле үпшыжлан тау Тыланет. Емыж ден саскан түрлө тамжылан тау Тыланет; эр лупсын алмаз гай чолгыжмыжлан тау Тыланет. Волгыдын шыргыжал помыжалтмылан тау Тыланет; пылпомышысо ылыш нерген шижтарыше ты мландымбал ылышлан тау Тыланет. Тау Тыланет, Юмо, курым-курумеш.

3-шо кондак

Кажне пеледыш, тудын тамле пушыжо, ныжыл түсшө Святой Шүлышын вийже дене темын, изи пеледышыште Күшылсын моторлыкшо коеш. Илышым пуышо Юмо олыкым пеледыш дене леведын, пасум шурно парчан шөртньыж дене пойдарен, кандывуйын моторлыкшо дене түрлен да тидым ужмо куан дене чоннам темен. Юмо, Тыланет чап да моктымаш. Куаныза да мурыза Тудлан: Аллилуиа!



3-шо икос

Шошын сенген толмыж годым Тый тунар
сылне улат, тунам чыла чонан ылыжеш. Тый
илышын тўналтышыже да колымашым сены-
ше улат манын, Тыйым тўжем тўрлө йўкын чы-
лан моктат. Шўшпык муро дене темше лап вер
ден чодыра тылзе волгыдышто сўан вургем дене
сылнешт шогат. Уло мланде — Тыйын марлан
налшаш ўдырет — шке Курымашлык Качыжым
вуча. Тый шудым тыге сўрастарет гын, ончыкы-
лык ылыж кынелме курымышто мемнам кузе
вашталтет: капнаже кузе уэмеш, чонна кузе чот
волгалтеш!

Мландысе пычкемыш гыч тўрлө сылне тў-
сым, тамым да тамле ўпшым лукметлан тау
Тыланет; пўртўсын поро кумылжо ден ла-
скалыкшылан тау Тыланет. Шкендын тўжем
тўрлө пўрымет дене мемнам йыр авырымет-
лан тау Тыланет; уло сандалыкыште палдыр-
ныше уш-акылетын келгытшылан тау Тыла-
нет. Ужаш лийдыме йолкопатын кышажым
пагален шупшалаш лиймылан тау Тыланет;
ончылно курымаш илышын волгыдо тулжым
чўктыметлан тау Тыланет. Колыдымо да ку-
рымашлык моторлыклан ўшаным пуыметлан
тау Тыланет. Тау Тыланет, Юмо, курым-ку-
рымеш.



4-ше кондак

Тыйын нерген шонышо енгым йывыртываш дене темет, Тыйын святой Шомакет илышым пуа, Тый денет мутланываш үй деч пушкыдо, мүй караш деч тамле. Тыланет кумалмаш шулдыранда, чоным ылыжта. Тунам шүмна йывыртен чүчка, пүртүс да уло илыш уш-акыл дене темеш, чапле лиеш! Кушто Тый уке улат — тушто чылажат яра да арам. Тыйын улмо верыште — чон поянлык, тушто илыш толкын семын муро йонга: Аллилуиа!

4-ше икос

Эртыше кечын шыпше да йүд омын ласкалыкше кастене мландымбак шарла. Ўжаран пыл лонгаште тунам Тыйын волгалтше полат гай пөртетым ужам. Илыме веретын каласен мошташ лийдыме улмыж нерген тул ден шемалге-йошкар, шөртнялге ден канде түс ончылгоч каласат да, айда Ачам дек каена манын, чот йывыртен үжыт.

Шып каслан тау Тыланет; тўнялан канаш пуыметлан тау Тыланет. Кече шичме годсо кас ўжаралан тау Тыланет; капкылым кандарыше поро омылан тау Тыланет. Йүд пычкемыште уло тўня деч торлымо годым Тыйын порылыкет лишне улмылан тау Тыланет; тарваныше чон-

нан кумыл тодылт кумалмыжлан тау Тыланет. Эре волгалтарыше курымаш кечын куанжым помыжалташ сöрыметлан тау Тыланет. Тау Тыланет, Юмо, курым-курымеш.

5-ше кондак

Айдемын шүмыштыжö Тыйын тулетын волгыдыжо волгалтеш гын, тудо енлан илыш поран лүдыкшö огыл. Йырымваш пычкемыш, уда игече, лүдмаш лиеш да поран урмыжеш гынат, тудын чоныштыжо шып да волгыдо: вет тушто — Христос! Да шүмжö мура: Аллилуиа!

5-ше икос

Шүдыр дене чолгыжшо кавам ужам да öрам: могай поян Тый улат, волгыдет чот шуко! Горасе волгыдын йолкынжо дене үмбакем курымашлык онча: тыгай изи да йöрдымö улам гынат, Господь мый денем, Тудын йöратыше кидше чыла вере арала.

Мыйын нерген чарныде тыршыметлан тау Тыланет; шонен ямдылыме егет-влак дене вашлиймемлан тау Тыланет. Йöратыше родо-тукымна, үшанле йолташна улмылан тау Тыланет; мыланна служитлыше вольык ден янлыкын үнгышö улмышт верч тау Тыланет. Илышнан волгыдо жапшылан тау Тыланет;



шүмнан яндар куанжылан тау Тыланет. Илаш, кошташ да ужаш пуымо пиаллан тау Тыланет. Тау Тыланет, Юмо, курым-курумеш.

6-шо кондак

Таул мардежан, күдырчан йүр годым Тый куатле да лишыл улат. Волгенче волгалт рашкалт-маште Тыйын виян кидет, öрыктарыше күкшытет коеш. Господын йүкшö пасу үмбалне, чодырасе йүк-йүаныште, Тудын йүкшö күдырчö күдыртымö да йүр йүрмаште, Господын йүкшö шуко вүд үмбалне. Тул дене шүлышö курык йүк Тыйым мокта. Тый мландым вургем гай чытырыктет, тенгыз толкыным кавашке нöлтет. Тыйым моктена, вет кугешныше айдемым үнгышемдет, да тудо үшан дене мура: Аллилуиа!

6-шо икос

Пайрем полатым волгенче волгалтара гын, лампе волгыдо вара йöрдымын чучеш. Илышемын кугу куанже годым Тый чоныштем тыгак вучыдымын волгалтынат. Волгенче гай волгыдет деч молыжо тусдымын, пычкемышын, үжка гай веле чучын. Тунам чонем Тыйын почешет вашкен.

Айдемын эн күкшö шонымыжын мучашдыме кумдыкшö, тау Тыланет; Юмо дене пырля

лияш кумылым пуыметлан тау Тыланет. Мландымбалысым чот аклыме деч корандыметлан тау Тыланет; Шкендын вичкыж йолкынет дене мемнам вўдылметлан тау Тыланет. Пычкемыш шўлыш-влакын вийыштым сўмыралын, чыла осалым пытараш шоныметлан тау Тыланет; чыла почмашетлан, Тыйым шижаш пуымо пи-аллан, пеленет илымылан тау Тыланет. Тау Тыланет, Юмо, курым-курумеш.

7-ше кондак

Өрыктарышын йонгышо түрлө йўкыштө Тыйын ўжмет шокта. Ныжылге мурын йымыжа семже, музыкын моторлык кўкшытшө да сылнымутын йонгалтмыж гоч Тый мыланна ончыкылык райын омсажым почат. Чыла сылнылык чоннам Тый декет куатлын нангая да куанен мураш ўжеш: Аллилуиа.

7-ше икос

Сўретче, поэт, шанчыен-влакын ушыштым Тый Святой Шўлыш дене волгалтарет. Кўшылсө Уш-акылын вийже дене нуно Тыйын законетым умылат, уш-акылетын мучашдыме келгытшым мыланна почыт. Нунын пашашт Тыйын нерген шижтара, вет Шке пўрымет гоч Тый чот куатле да айдеме дене ушнымаште пеш виян улат.



Сандалыкысе законын Күшылсө озаже ул-
мым ончыктыметлан тау Тыланет; законетын
негызше дене уло пүртгүсын теммыжлан тау
Тыланет. Мо күлешым мыланна Шке порылы-
кет дене почметлан тау Тыланет; почаш күлды-
мым мемнан деч Шке уш-акылетын келгытше
дене петырыметлан тау Тыланет. Айдеме ушын
кугу усталыкше верч тау Тыланет; ылыш вийым
пуышо пашалан тау Тыланет. Кумыл нөлтын
ыштыме пашан тулйолкын гай лектышыжылан
тау Тыланет. Тау Тыланет, Юмо, курым-ку-
рымеш.

8-ше кондак

Черланыме годым Тый пеш лишне улат, чер-
ле дек Шкеак толат, оранышын вакшышыж
воктек лишемат, тунам шүмна Тый денет мут-
лана. Неле ойго да орлык годым чоннам тыныс
дене волгалтет, вучыдымо полышым колтет,
лыпландарет. Тый тергыше да утарыше йөра-
тымаш улат, да ме Тыланет мурена: Аллилуиа.

8-ше икос

Изиэм годым Тыйым икымше гана пале-
нак сөрвалымем годым Тый йодмем шуктенат,
тунам чонем поро лыпланымаш дене темын.
Поро улметым, Тый декет толшо-влакын поро

пиалан улмыштым умылен, Тыйым уэш да уэш
ўжаш тўнгалынам, кызытат ойлем:

Чыла йодмем порылан шуктышо, тау Тыланет;
мыйым йўдшө-кечыже аралыше, тау Тыланет.
Лишыл еннам йомдарыме ойгым жап йогын дене
эмлыметлан тау Тыланет; ўшаным йомдарымаш
Тый денет уке, курымашлык илышым пуыметлан
тау Тыланет. Мо поро ден кўкшө, тудлан колыдымо
лияш пўрыметлан, колышо лишылна-влак дене
вашлийшашым сөрыметлан тау Тыланет. Тау Тыланет,
Юмо, курым-курымеш.

9-ше кондак

Молан гын пайрем годым уло пўртүс шыр-
гыжеш? Мландымбалне нимо дене тангастараш
лийдыме куштылгылык шўмыш пура, алтарь
ден храмын южшо волгыдым кондышо лиеш?
Тиде Тыйын порылыкетын шўлалтымыже,
Фавор курыкысо волгыдын йолкынжо. Пыл-
помыш ден мланде тунам моктен мурат: Ал-
лилуиа.

9-ше икос

Лишыл ен-влаклан служитлаш кумылан-
дымет годым Тый чонем ўнгышемаш дене вол-
галтенат. Ик йолкынжо шўмышкем логалын,



шүмем тулеш йошкаргыше күртнӧ гай волгал-
таш тӱнгалын, да мый Тыйын ужаш лийдыме
ӧрыктарыше Чуриетым ужинам.

Поро пашат дене мемнан илышнам
вашталтыметлан тау Тыланет; чыла кӱшты-
машетым ӧрыктарыше шере там дене те-
мыметлан тау Тыланет. Чаманымаш тамле
пушым шарыметлан тау Тыланет; енын ой-
гыжым палаш туныкташ мыланнат йомдары-
маш ден орлыкым колтыметлан тау Тыланет.
Порылыкым кугун аклымет да тидлан кӧра
кугу пӧлекым пуметлан тау Тыланет; порым
ышташ шонымо кумылым шотыш налметлан
тау Тыланет. Мландымбалне да пылпомышто
мо улмо деч кӱшкӧ йӧратымашым нӧлтымет-
лан тау Тыланет. Тау Тыланет, Юмо, ку-
рым-курымеш.

10-шо кондак

Мо шырпын шалана, тудым уэш чумыраш
ок лий гынат, Тый намысышт шӱын пытыше
ен-влакымат уэмдет, моторлыкым йомдары-
ше чонлан ончычсо сылнылыкым пӧртылтет.
Тӧрлатен кертдымаш Тый денет уке. Тыйым,
Пӱрышым да Пӧртылтышым, муро дене мокте-
на: Аллилуиа.

10-шо икос

Эр үжара лүман кугешныше суксын камвоч-мыжым палыше Юмем, порылыкетын вийже дене мыйым утаре, Тый дечет корангаш ит пу, кокыте шонымашым коранге. Тыйын öрыктарыше йүкетым үмырем мучко колаш манын, пылышем пүсемде. Тыланет, чыла вере улшылан, моктен ойлаш лийже:

Шонен пыштымет семын чылажат шукталтмылан тау Тыланет; порылыкет нерген ончылгоч шижмемлан тау Тыланет. Шолып йүкетым палдарыметлан тау Тыланет; омо дене да шинча ончылно мом почметлан тау Тыланет. Шонен пыштыме арам пашам шалатыметлан тау Тыланет; аныртыше аяр пуш деч мемнам орлык дене шөрлыктарыметлан тау Тыланет. Кугешныше шүмнам мемнам утарышаш верч үнгышемдыметлан тау Тыланет. Тау Тыланет, Юмо, курым-курымеш.

11-ше кондак

Юмын шүлышын шокшыжым мый курымласе йүштö шинчыр-влак гоч шижам, вүр йогымым колам. Тый лишне улат, вет жапын ужашыже йомын. Теве Тыйын Ыресет коеш — тудо мыланем верчат лийын. Шүлышем Ырес



ончылно, пуракыште кия. Тиде йӱратымаш да Утарымаш пайрем, курымеш йонга тыште мок-тымо мут: Аллилуиа.

11-ше икос

Тыйын Кугыжанышыштет кас кочкышым ыштышаш еҥ поро пиалан. Тый тиде поро пиалым мыланем мландымбалне тамлен ончаш пуэнат. Шке Юмын кидет дене мылам Капет ден Вӱретым мыняр гана шуенат! Мый, шуко сулыкан еҥ, тиде святынбым көргышкем налам да Тыйын каласен мошташ лийдыме öрыктарыше йӱратымашетым шижам.

Порылыкетын куатле илыш вийжылан тау Тыланет; орланен пытыше тӱнмялан Шке Черкетым шып вер семын пуыметлан тау Тыланет. Тынеш пурымо годым илышым пуышо вӱд дене уэмдыметлан тау Тыланет; сулыкшо верч öкынышö енлан нарашта лилий гай яндарлыкым пöртылтыметлан тау Тыланет. Сулыкым касарыше пундашдыме келгыт, тау Тыланет; илышын чашыже да курымашлык куанын киндыжлан тау Тыланет. Мемнам пылпомышыш нöлтшышö, тау Тыланет. Тау Тыланет, Юмо, курым-курымеш.

12-шо кондак

Кольшо енгын чурийыштыже Тыйын чапетын йолгалтмыжым ятыр гана ужынам. Моторлык ден куанышт мландымбалне илымышт годсо деч сылне. Волгалтше чурий тўсышт пиалан улмыштым, лыпланымашке шумыштым палдара да мемнам Тый декет шыпак ўжеш. Колымо шагатыште мыйын чонемат волгалтаре, вет тудо мура: Аллилуиа.

12-шо икос

Моктымашем Тыйын ончылнет нимом окшого! Вет Херувим-шамыч моктымым мый колын омыл, тидым кўкшө чонан енг-влак веле ыштен кертыт. Пўртўсын Тыйым кузе моктымым мый сайын палем. Ош вургемым чиен, лум пырчын алмазше дене уло мланде чолгыжеш, тылзе волгыдан теле йўдым Тыланет шып кумалеш. Нўлталтше кече Тыйын нерген куанен шижтара, кайык тўшка мурен чапландара. Чодыра Тыйын нерген ўрыктарышын гўжла, мардеж шўшка, вўд шыргыкта. Мучашдыме сандалыкысе волгалтыш-влакше радамышт дене ийын коштыт да Тыйын нерген туныктен ойлат. А мыйын моктымашем тўсдымў! Пўртўс мут колыштшо, а мый — уке. Тыйын йўратымашетым ужын, илымем



годым таум ыштынем, кумалнем да каласы-
нем:

Мыланна волгыдым ончыктышо, тау Ты-
ланет; Юмын йöратымашетын висаш лийдыме
келгытшылан тау Тыланет. Мемнам волгыдо
дене, шуко Суксо да святой-влак дене левед-
метлан тау Тыланет; Эн Святой Ачана, Шке
Кугыжанышетым мыланна сöрыметлан тау Ты-
ланет. Сулен налше Эрге, утаралтмаш деке кор-
ным почметлан тау Тыланет; Святой Шүлыш,
ончыкылык курымын Илышым пуышо Кечы-
же улметлан тау Тыланет. Чот поро Кумытло
Юмо, чылаж верчат тау Тыланет. Тау Тыланет,
Юмо, курым-курымеш.

13-шо кондак

Илышым пуышо Чот поро Кумытло Юмо,
Тыйын чыла чаманымашетлан таум ыштымы-
нам нал, мемнам Шке порылыкетлан йöрышым
ыште, мыланна пуымо моштымашым шукемде,
тунам ме Господьнан курымаш куанышкыже
пурена да сенымаш мурым мурена: Аллилуиа.

*(Тиде кондак кум гана лудалтеш, вара 1-ше
икос да 1-ше кондак лудалтеш).*



АКАФИСТ ЛУДМО ДЕЧ ВАРА МОЛИТВА-ВЛАК

Таум ыштыме молитва

Мемнан Господь Иисус Христос Юмына, чот чаманыше да йөрәтен полшышо Юмо. Тыйын чаманымашет висен керташ лийдыме, айдемым йөрәтымашет пеш келге. Тыйын куатет деке ме йөрдымө кул семын лүдын-аптыранен лишемына да мыланна ыштыме чыла порылыкетлан таум ыштена. Кучен ашныше да Порым ыштыше Господь, Тыйым кугуэш ужына, чап-ландарена, моктен мурена, вуйнам савен, адак тауштена! Каласен мошташ лийдыме чаманымашетым пален, үнгышын сөрвалена: мемнан йодмынам колын, кузе нуным эре шуктенат, ончыкшат мыланна Тыйым да лишыл-влакым йөрәташ, чыла поро пашаште пенгыдемаш полшо. Түнгалтышдыме Тыйын Ачат да Поро, Ик-так улшо Тыйын Святой Шүлышет дене пырля



Тыланет таум ышташ да чапландараш лийже.
Аминь.

Пытартыш молитва (*Достойно есть...*)

Тыйым, мемнан Юмым Шочыктышо Авам,
Сулыкдымым, курым-курумак Пиаланым,
чынак мокташ күлеш. Херувим-шамыч дечат
утла пагалышашлык лийынат, Серафим-ша-
мыч дечат тангастарыдыме чапле лийынат, Ты-
йым, чынак Эрге Юмым языкдеак шочыктышо
Авам, кугу улат манын моктена.

Тау Ачалан, Эргылан, Святой Шүлышлан,
кызытат, керек-кунамат, курым-курум мучкак.
Аминь.

Юмо, серлаге (*3 гана*).

Господь Иисус Христос, Юмын Эрге, Эн
Яндар Тыйын Аватын, преподобный да Юмым
шке көргыштышт нумалше ача, да чыла свя-
той-влакын кумалмышт дене мемнам, сулы-
кан-шамычым, серлаге, вет Тый Поро да Айде-
мым йөратыше улат. Аминь.

Москван Златоустшо

«Чылаж верчат Юмылан тау» акафистым
митрополит Трифон (Борис Петрович Тур-
кестанов) революций деч вара возен. Шкеже

1861 ий 29 ноябрьште Москваште шочын. Ачаже, князь Туркестанов (1830—1891), Грузийысе кугезе князь тукым гыч лийын. Кугезе кочашт Петр I кугыжа годым Российыш илаш толын. Ончыкылык святительын аваже, Варвара Александровна, шочынжо княжна Нарышкина лийын. Йочаже чот черле годым тудо святой мученик Трифон лүмеш черкыш сөрвалаш миен. Эргыже паремеш гын, тудым Юмылан служитлаш пуаш, а монах чиным налеш гын, тудым Трифон манын лүмдаш сөрэн. Паремше шочшыжым Оптиныш, уло Российлан палыме старец Амвросий деке нангаен. Лишеммыштым ужын, Амвросий ача калыклан кугу йүкын каласен: «Архиерей толеш, корным пуыза». Коран шогалше ең-влак архиерей олмеш ўдырамаш ден изи йочам ужыныт.

Борис шке ача-аваж деч благословенийым йодын да 1887 ийыште старец Амвросий деке Оптин Пустыньыш каен. Ныл ий гыч Трифон лүм дене монах лийын, тыге аважын сөрымыжым шуктен. Икмыняр жап гыч иеродиакон, а вара иеромонах саным налын. Старец Амвросийын ойжо почеш Москосо Духовный академийыш пурен, тунеммыж годым пересыльный тюрьмаште служитлен. Академийым тунем пытарыме жаплан богословий дене шанчыен лийын. Тудо руш йыл-

мым да эше вич йот йылмым сайын пален. Трифон ача ончыч Москосо Духовный училищыште пашам ыштен, вара Вифанский да Москосо Духовный семинарийын ректоржолыйын. 1901 ий 18 июль гыч тудым Дмитровскийн епископшо да Москосо епархийын викарийжылан шогалтат. Тиде постышто 15 ий наре тыршен, Оптин да Гефсиман старец-влак дене пенгыде кылым кучен. Службым мастарын вүдымыжлан владыкам «Москон Златоустшо» маннын лүмденыт.

Икымше тўнямбал сар годым армийыште служитлен. Польский фронтышто контузитлалтын, 1916 ий гыч Ново-Иерусалимский Воскресенский монастырьыште, а 1918 ий гыч Москошто илен. Юмылан ўшаныше калык тудым кугу архиерей, сай туныктышо да старец семын чот аклен, ой йодаш пеш шукын коштыныт. Руш Православный Черкын илышыштыже тудын шомакшым эре шотыш налыныт. Святой патриарх Тихон владыкым пеш йөрарен, чўчкыдын пырля служитлен. Владыкым 1923 ий гыч архиепископ, а 1931 ий гыч митрополит саныш шогалтеныт. Тудым кугун пагалымаш нерген художник Павел Корин тыге ойлен: «Эртыше Русь» кугу сўретлан могай енын портретшым ышташ шоненам, нуно митрополит Трифоннын благословитлымыж деч посна кўнен огытыл».

Колымыж деч изиш ондак владыка «Чылаж верчат Юмылан тау» лүман öрыктарыше акафистым возен. Тиде акафист Руш Православный Черкын духовный завещанийже лийын, эн неле жапыште чыла чыташ да чылаж верчат Юмылан таум ышташ полшен да полша. Митрополит Трифон 1934 ий 14 июньышто колен. Тудым Москосо Введенский шүгареш тоеныт. Тудын шүгарже деке кызыт мартеат шуко ен коштеш.

**«ЧЫЛАЖ ВЕРЧАТ ЮМЫЛАН ТАУ»
АКАФИСТ**

На марийском (луговом) языке

АКАФИСТ «СЛАВА БОГУ ЗА ВСЕ»

Ответственный за выпуск
протоиерей Николай Чузаев

Подписано к печати 23.11.2025. Формат 60x84/16.

Бумага офсетная. Гарнитура «Times».

Печать офсетная. Печ. л. 1,75.

Заказ № . Тираж 1000 экз.

Отпечатано с готового оригинал-макета
в типографии ООО ИПФ «СТРИНГ»
424006, Республика Марий Эл, г. Йошкар-Ола,
ул. Строителей, д. 95, корпус 101 А, помещение 12–12 А.